

– Ահա քո զենքերը, դրանց բանեցնելու մեջ դու նոյնպես անվարժ չես մնայ:

Ես ուրախութիւնից այն աստիճան շփոթեցայ, որ մի խօսք անգամ չգտայ շնորհակալութիւնս յայտնելու միայն երեխայի նման փաթաթեցայ նրա վզովը եւ սկսեցի համբուրել: Ես երեւակայում էի, թէ աշխարհի բոլոր թագաւորութիւնները ինձ են տոած:

Կարօն տոեց ինձ եւ մի ձեռք շոր, պատողիբեց հագուստս փոխել: Իմ նոր հագուստի մեջ ոչ թէ մայրս, ոչ թէ տեր Թողիկը, այլ սատանան եւս չէր կարող ճանաչել ինձ: Ես այժմ իմ հագուստով բոլորովին նման էի ընկերներին:

– Դէ՛, նստիր, – ասաց Կարօն, ինքն նոյնպես իր ձին հեծնելով:

Ասլանը եւ Սագօն արդէն ձիաւորուած էին: Մենք ճանապարհ ընկանք: Երկու գեյթունցիները մնացին մինարեթի մեջ, երեւի, այն պատերազմական մթերքը պահելու համար, որը ես ցերեկով տեսել էի աշտարակի վերին յարկում:

Արեգակի վերջին շառաւիղները դեռ խաղ էին անում մինարեթի կապոյտ մոզայիկների հետ, երբ մենք բաժանուցանք այդ հսկայ շինածքից: Ես իմ ստացած նոր ընծաներով այնքան գրաւուած էի, մինչեւ անգամ ընկերներիցս չհարցրի, թէ ո՞ր ենք գնում: Իմ գեղեցիկ նժոյգը ընթանում էր արագ, որպէս մարդու միտքը. իմ զենքերը շողշողում էին փառաւոր, սպառնական լուսով:

Կարօն չսխալուեցաւ իր կարծիքի մեջ, այո՛, ես այնքան հմուտ էի զենքերի գործածութեան մեջ, որքան ձի հեծնելում: Շատ քիչ էր պատահում, որ իմ գնդակը շեղուէր նպատակից, որովհետեւ ես որսորդ Աւօյի թէեւ փոքրիկ, բայց լաւ աշակերտն էի, – աշակերտը այն մարդու, որի անտան հետ կապուած էին այնքան սարսափելի պատմութիւններ...: Բայց նա մնաց միշտ բարի դէպի ինձ եւ դէպի մեր ընտանիքը: Նրա տնում միշտ գտնուում էր իմ համար մի անելորդ հրացան, որով ես փորձեր էի անում: Առաջին փորձը արեցի մեր հաւերի վրայ. մայրս ինձ շատ անիծեց, երբ տեսաւ, որ իր սիրելի վառելիքներից մէկը թաւալւում էր մեր բակի մեջ: Նա իսկոյն վազեց վարժապետի մօտ բողոքելու...

Իսկ երբ որսորդը իր ընտանիքով թողեց մեր քաղաքը, մայրս մասամբ ուրախ էր, որ ազատուեցաւ մի այսպիսի դրացուց, որը նրա կարծիքով, իր որդուն փչացնում էր, խելքից հանում էր: Բայց ես երկար չէի կարող մոռա-